



Anna Berther,
1923-1999

Cura che nus vein dau troccas da Daniev vess negin sminau che l'Anna banduni nus strusch in miez onn suenter. Ella deva siu giug preferiu cun slontsch sco adina fagend spass e dend teccas mintgaton. Ver 2 meins suenter sefan cert simtoms d'in malessier valer. Quei derivi dalla grippa manegiava ella che curreva buca per mintga trapla tiel miedi. Mo la finala fa ella quei tuttina e sin siu cussegli serenda ella el spital. Igl ei lu seresultau ch'ei era zatgei pli serius. Ei suonda ina greva operaziun, lu in temps da speronza, mo deplorablamein ha la malsogna giu il surmaun. Ils 23 da zercladur 1999 sedurmenta ella per adina.

Anna Berther ei naschida da Nossadunna da candeilas 1923 sco 7avel affon dalla famiglia da Vigeli e Mariuschla Berther-Schmid da Gonda. Suenter esser stada orda scola eis ella stada en differentas plassas ella Bassa. Lu eis ella returnada a casa per gidar il bab a far il pur. Quei fageva ella fetg bugen. Dasperas fageva ella lavurs occasiunalas seo ir a survir ni sco cassiera dalla Sutgera Cungieri. El temps liber mava ella bugen a cantar el Chor mischedau, dil qual ella era commembra d'honor. Pli tard rugalava ella era bugen las fossas dils ses ed era numerusas da defuncts da negin.

Igl onn 1974 sedecida l'Anna ensemen cun sias duas soras Barla e Sofia da baghegiar il hotel Mira. Ellas prendan ils geniturs cun elllas e meinan il hotel 15 onns. Ella funcziun sco hoteliera sesenteva l'Anna bein, appreziava ella gie il contact cun ils hospes indigens ed jasters. Cura ch'il hotel ei vegnius vendius lavura ella aunc tscheu e leu, per lu saver guder per propri il temps dalla SVS. Ensemen cun sia sora Sofia passenta ella in bi temps da pensiun en bien contact culs parents, vischins ed enconuschents che appreziavan la beinvulientscha, la survetscheivladad e l'hospitalitat dallas soras Berther. Da temps en temps fageva l'Anna era bugen in viadi per dar empau variaziun alla veta da mintgadi. Ussa ha ella fatg siu pli davos viadi - ella patria celestrial!

Norbert Berther